

শ্রীশ্রীগোদ্রুমচন্দ্রায় নমঃ
শ্রীমদ্ভক্তিবিনোদ ঠাকুর-বিরচিত
শ্রীশ্রীনবদ্বীপ-ভাবতরঙ্গ

সর্বধামশিরোমণি সন্ধিনীবিলাস ।
ষোলক্ৰোশ নবদ্বীপ চিদানন্দবাস ॥
সর্বতীর্থ-দেব-ঋষি-শ্রুতির বিশ্রাম ।
স্মরক্ নয়নে মম নবদ্বীপ-ধাম ॥১
মাথুর মণ্ডলে ষোল ক্ৰোশ বৃন্দাবন ।
গৌড়ে নবদ্বীপ তথা দেখুক নয়ন ॥
একের প্রকাশ দুই অনাদি চিন্ময় ।
প্রভুর বিলাস-ভেদে শুদ্ধ ধামদ্বয় ॥২
প্রভুর অচিন্ত্যশক্তি অনাদি চিন্ময়ে ।
জীব নিস্তারিতে আনে প্রপঞ্চ-নিলয়ে ॥
সেই কৃষ্ণকৃপাবলে জড়-বদ্ধ জন ।
বৃন্দাবন নবদ্বীপ করুক দর্শন ॥৩
যোগ্যতা লভিয়া সব জীবেন্দ্রিয়গণ ।
চিন্ময় বিশেষ সুখা করে আশ্বাদন ॥
অযোগ্য ইন্দ্রিয় তাহা আশ্বাদিতে নারে ।
ক্ষুদ্র জড় বলি তারে নিন্দে বারে বারে ॥৪
কৃষ্ণ, কৃষ্ণভক্ত-কৃপা যোগ্যতা কারণ ।
জীবে দয়া সাধুসঙ্গে লভে ভক্তজন ॥
জ্ঞানকর্মযোগে সেই যোগ্যতা না হয় ।
শ্রদ্ধাবলে সাধুসঙ্গে করে জড় জয় ॥৫
জড় জাল জীবেন্দ্রিয়ে ছাড়ে যেই ক্ষণ ।
জীবচক্ষু করে ধাম-শোভা দর্শন ॥
আহা কবে সে অবস্থা হইবে আমারে ।

দেখিব শ্রীনবদ্বীপ জড়মায়া পারে ॥৬
অষ্টদলপদ্মনিভ ধাম নিরমল ।
কোটি চন্দ্র জ্যোৎস্না জিনি অতীব শীতল ॥
কোটি সূর্যপ্রভা যিনি অতি তেজোময় ।
আমার নয়ন-পথে হইবে উদয় ॥৭
অষ্টদ্বীপ অষ্টদল মধ্যে দ্বীপবর ।
অন্তর্দ্বীপ নাম তার অতীব সুন্দর ॥
তার মধ্য-ভাগে যোগপীঠ মায়াপুর ।
দেখিয়া আনন্দলাভ করিব প্রচুর ॥৮
ব্রহ্মপুর বলি শ্রুতিগণ যাকে গায় ।
মায়ামুক্ত চক্ষুে আহা মায়াপুর ভায় ॥
সর্বোপরি শ্রীগোকুল নাম মহাবন ।
যথা নিত্যলীলা করে শ্রীশচীনন্দন ॥৯
ব্রজে সেই ধাম গোপ-গোপীগণালয় ।
নবদ্বীপে শ্রীগোকুল দ্বিজবাস রয় ॥
জগন্নাথমিশ্র গৃহ পরম পাবন ।
মায়াপুরমধ্যে শোভে নিত্য নিকেতন ॥১০
মায়াজালাবৃত চক্ষু দেখে ক্ষুদ্রাগার ।
জড়ময় ভূমি জল দ্রব্য যত আর ॥
মায়া কৃপা করি জাল উঠায় যখন ।
আঁখি দেখে সুবিশাল চিন্ময় ভবন ॥১১
যথা নিত্য-মাতাপিতা দাসদাসীগণ ।
শ্রীগৌরাস্তে সেবে প্রেমে মত্ত অনুক্ষণ ॥

লক্ষ্মীবিষুপ্রিয়া সেবে প্রভুর চরণ।
 পঞ্চতত্ত্বাত্মক প্রভু অপূর্ব দর্শন ॥১২
 নিত্যানন্দ শ্রীঅদ্বৈত সেই মায়াপুরে।
 গদাধর শ্রীবাসাদি স্থানে স্থানে স্ফুরে ॥
 অসংখ্য বৈষ্ণবালয় চতুর্দিকে ভায়।
 হেন মায়াপুর কৃপা করুণ আমায় ॥১৩
 নৈঋতে যমুনা গঙ্গা স্বসৌভাগ্য গণি।
 নাগরূপে সেবা করে গোরা দ্বিজমণি ॥
 ভাগীরথী-তটে বহু ঘাট দেবালয়।
 প্রৌঢ়ামায়া বৃদ্ধশিব উপবনচয় ॥১৪
 অসংখ্য ব্রাহ্মণ-গৃহ মায়াপুরে হয়।
 রাজপথ চত্বর বিপিন শিবালয় ॥
 পূর্ব দক্ষিণেতে এক সরস্বতী ধার।
 নিরবধি রহে ইশোদ্যান তটে যার ॥১৫
 এসব বৈভব নিত্য চিন্ময় অপার।
 কেন পাবে কলিজীব মায়াবদ্ধ ছার ॥
 ত্রিনদী-ভাঙ্গন-ছলে লুকাইল মায়া।
 জড় চক্ষু দেখে মাত্র মায়াপুর ছায়া ॥১৬
 সশক্তিক নিত্যানন্দ-কৃপাবল-ক্রমে।
 স্ফুরক্ নয়নে মায়াপুরী সসম্ভ্রমে ॥
 শ্রীগৌরাঙ্গ-গৃহলীলা করি দরশন।
 অতি ধন্য হউ এই মূঢ় অকিঞ্চন ॥১৭
 অন্তর্দ্বীপ-মধ্যে যেই মায়াপুর গ্রাম।
 অষ্টদল কমলের কর্ণিকা সে ধাম ॥
 গৌরকান্তি পীত জ্যোতির্ময় সুনির্মল।
 করুন নয়নে মোর সদা বলমল ॥১৮
 কোনস্থানে উপবন পৃথু সরোবর।
 গোচারণভূমি কত দেখিতে সুন্দর ॥

প্রবাহপ্রণালী কত শস্যভূমি খণ্ড।
 রাজপথ বকুল কদম্ব বৃক্ষ যণ্ড ॥১৯
 তাহার পশ্চিমে জহু-তনয়ার তট।
 শ্রীগঙ্গানগর নামে প্রসিদ্ধ খব্বট ॥
 যথা গঙ্গাদাস-গৃহে বিদ্যানুশীলন।
 করিলেন প্রভু মোর লয়ে দ্বিজ-জন ॥২০
 ভরদ্বাজটীলা তথা দেখিতে সুন্দর।
 গৌর ভজি যথা ভরদ্বাজ মুনিবর ॥
 লভিয়া চৈতন্যপ্রেম সূত্র প্রকাশিল।
 কতশত বহির্মুখ জনে ভক্তি দিল ॥২১
 পৃথুকুণ্ড উত্তরেতে মথুরা নগর।
 ষষ্ঠীতীর্থ মধুবন পরম সুন্দর ॥
 বহুজনাকীর্ণ জনপদ সুবিস্তার।
 দর্শনে পবিত্র হউ নয়ন আমার ॥২২
 তদুত্তরে শরডাঙ্গা স্থান মনোহর।
 রক্তবাহুভয়ে যথা শবর প্রবর ॥
 নীলাদ্রিপতিকে লয়ে রহে সংগোপনে।
 সেই স্থান দেখি যেন সর্বদা নয়নে ॥২৩
 মথুরায় বায়ুকোণে হেরিব নয়নে।
 সীমন্ত-দ্বীপের শোভা জাহ্নবী-সদনে।
 যথায় পার্বতীদেবী গৌরপদ-ধূলি।
 সীমন্তে ধারণ কৈল করিলা আকুলি ॥২৪
 দূর হইতে বিলোকিব বিশ্বপঙ্কবন।
 যথা গৌরধ্যানে আছে ঋষি চতুঃসন ॥
 নিতাইবিলাসভূমি দেখিব সুদূরে।
 যথা সঙ্কর্ষণ-ক্ষেত্র বিজুজনে স্ফুরে ॥২৫
 মায়াপুর-দক্ষিণাংশে জাহ্নবীর তটে।
 সরস্বতী-সঙ্গমের অতীব নিকটে ॥

ঈশোদ্যান নাম উপবন সুবিস্তার।
 সর্বদা ভজনস্থান হউক আমার ॥২৬
 যে বনে আমার প্রভু শ্রীশচীনন্দন।
 মধ্যাহ্নে করেন লীলা লয়ে ভক্তজন ॥
 বনশোভা হেরি রাধাকুণ্ড পড়ে মনে।
 সে-সব স্মরুক্ সদা আমার নয়নে ॥২৭
 বনস্পতি কৃষ্ণলতা নিবিড় দর্শন।
 নানা পক্ষী গায় তথা গৌরগুণগান ॥
 সরোবর শ্রীমন্দির অতি শোভা পায়।
 হিরণ্য-হীরক-নীল-পীতমণি ভায় ॥২৮
 বহির্মুখজন মায়ামুগ্ধ আঁখিদ্বয়ে।
 কভু নাহি দেখে সেই উপবনচয়ে ॥
 দেখে মাত্র-কন্টক আবৃত ভূমিখণ্ড।
 তটিনী বন্যার বেগে সদা লগুভণ্ড ॥২৯
 মধুবন মধ্যভাগে শ্রীবিশ্রামস্থল।
 শ্রীধরকুটীর আর কুণ্ড নিরমল ॥
 কাজীরে শোধিয়া প্রভু লয়ে পরিকর।
 যথায় বিশ্রাম কৈল ত্রিদশ-ঈশ্বর ॥৩০
 হা গৌরঙ্গ বলি কবে সে বিশ্রামস্থলে।
 গড়াগড়ি দিয়া আমি কাঁদিব বিরলে ॥
 প্রেমাবেশে দেখিব শ্রীগৌরঙ্গসুন্দরে।
 লৌহপাত্রে জল পিয়ে শ্রীধরের ঘরে ॥৩১
 কবে বা সৌভাগ্যবলে নয়ন আমার।
 হেরিবে কীৰ্ত্তনমাঝে শচীর কুমার ॥
 নিত্যানন্দাঐত গদাধর শ্রীনিবাসে।
 লয়ে নাচে প্রেম যাচে শ্রীধর আবাসে ॥৩২
 তার পূর্বে বিলোকিব সুবর্ণবিহার।
 সুবর্ণসেনের দুর্গ তুল্য নাহি যার ॥
 যথায় শ্রীগৌরচন্দ্রসহ পরিকর।

নাচেন সুবর্ণমূর্তি অতি মনোহর ॥৩৩
 একাকী বা ভক্তসঙ্গে কবে কাকুশ্বরে।
 কাঁদিয়া বেড়াব আমি সুবর্ণনগরে ॥
 গৌরপদে শ্রীযুগল-সেবা মাগি লব।
 শ্রীরাধাচরণাশ্রয়ে প্রাণ সমর্পিব ॥৩৪
 তার পূর্বদক্ষিণেতে শ্রীনৃসিংহ-পুরী।
 কবে বা হেরিব দেবপল্লীর মাধুরী ॥
 নরহরি-ক্ষেত্রে প্রেমে গড়াগড়ি দিয়া।
 নিষ্কপট কৃষ্ণপ্রেম লইব মাগিয়া ॥৩৫
 এ দুষ্ট হৃদয়ে কাম আদি রিপু ছয়।
 কুটিনাটি প্রতিষ্ঠাশা শাঠ্য সদা রয় ॥
 হৃদয়শোধন আর কৃষ্ণের বাসনা।
 নৃসিংহ-চরণে মোর এই ত' কামনা ॥৩৬
 কাঁদিয়া নৃসিংহ-পদে মাগিব কখন।
 নিরাপদে নবদ্বীপে যুগল-ভজন ॥
 ভয়, ভয় পায় যাঁর দর্শনে, সে হরি।
 প্রসন্ন হইবে কবে মোরে দয়া করি ॥৩৭
 যদ্যপি ভীষণ মূর্তি দুষ্ট জীব প্রতি।
 প্রহ্লাদাদি কৃষ্ণভক্তজনে ভদ্র অতি ॥
 কবে বা প্রসন্ন হ'য়ে সকুপ-বচনে।
 নির্ভয় করিবে এই মূঢ় অকিঞ্চনে ॥৩৮
 স্বচ্ছন্দে বৈস হে বৎস শ্রীগৌরঙ্গধামে।
 যুগলভজন হউ, রতি হউ নামে ॥
 মম ভক্তকৃপাবলে বিঘ্ন যাবে দূর।
 শুদ্ধচিত্তে ভজ রাধা-কৃষ্ণ-রসপুর ॥৩৯
 এই বলি' কবে মোর মস্তক-উপর।
 স্বীয় শ্রীচরণ হর্ষে ধরিবে ঈশ্বর ॥
 অমনি যুগল-প্রেমে সাত্ত্বিক বিকারে।
 ধরায় লুটিব আমি শ্রীনৃসিংহদ্বারে ॥৪০

সে ক্ষেত্রের পশ্চিমেতে গণ্ডকের ধার ।
 শ্রীঅলকানন্দ কাশীক্ষেত্র হয়ে পার ॥
 দেখিব গোদ্রুমক্ষেত্র অতি নিরমল ।
 ইন্দ্রসুরভির যথা ভজনের স্থল ॥৪১
 গোদ্রুম-সমান ক্ষেত্র নাহি ত্রিভুবনে ।
 মার্কণ্ডেয় গৌরকৃপা পায় যেই বনে ॥
 যেমন সংলগ্ন সরস্বতীনদীতটে ।
 ঈশোদ্যান রাধাকুণ্ড জাহ্নবী-নিকটে ॥৪২
 ভজরে ভজরে মন গোদ্রুম-কানন ।
 অচিরে হেরিবে চক্ষু গৌরলীলাধন ॥
 সে লীলা-দর্শনে তুমি যুগল-বিলাস ।
 অনায়াসে লভিবে পূরিবে তব আশ ॥৪৩
 গোদ্রুম শ্রীনন্দীশ্বর-ধাম গোপাবাস ।
 যথা শ্রীগৌরান্ধ করে বিবিধ বিলাস ॥
 পূর্বাহ্নে গোপের ঘরে গব্যদ্রব্য খাই ।
 গোপসনে গোচারণ করেন নিমাই ॥৪৪
 গোপগণ বলে, ভাই তুমি ত' গোপাল ।
 দ্বিজরূপ কভু তব নাহি সাজে ভাল ॥
 এস কাঁধে করি তোরে গোচারণ করি ।
 মায়ে'র নিকটে লই যথা মায়াপুরী ॥৪৫
 কোন গোপ স্নেহ করি' দেয় ছানা-ক্ষীর ।
 কোন গোপ রূপ দেখি হয় ত' অস্থির ॥
 কোন গোপ নানা ফল-ফুল দিয়া করে ।
 বলে ভাই নিতি নিতি আইস মোর ঘরে ॥৪৬
 বিপ্রে'র ঠাকুর তুমি গোপের কারণ ।
 তোমা ছাড়ি যেতে নারি তুমি ধ্যান জ্ঞান ॥
 ঐ দেখ গাভী সব তোমা'রে দেখিয়া ।
 হাস্‌বারবে ডাকে ঘাস-বৎস তেয়াগিয়া ॥৪৭

আজ বেলা হইল চল জগন্নাথালয় ।
 কাল যেন এই স্থানে পুনঃ দেখা হয় ॥
 রাখিব তোমার লাগি দধি-ছানা-ক্ষীর ।
 বেলা হইলে জে'ন আমি হইব অস্থির ॥৪৮
 এইরূপে নিতি নিতি শ্রীগোদ্রুম-বনে ।
 শ্রীগৌর-নিতাই খেলা করে গোপসনে ॥
 বেলা না হইতে পুনঃ করি' গঙ্গাস্নান ।
 শ্রীশচীসদনে যান গৌর ভগবান্ ॥৪৯
 হেন দিন আমার কি হইবে উদয় ।
 হেরিব গোদ্রুম-লীলা শুদ্ধ প্রেমময় ॥
 গোপসঙ্গে গোপভাবে প্রভু-সেবা-আশে ।
 একমনে বসিব সে গোদ্রুম-আবাসে ॥৫০
 গোদ্রুম দক্ষিণে মধ্যদ্বীপ মনোহর ।
 বনরাজি শোভে যথা দেখিতে সুন্দর ॥
 যথায় মধ্যাহ্ন প্রভু ল'য়ে ভক্তগণ ।
 সপ্তঋষি কাছে আসি দিল দরশন ॥৫১
 যথায় গোমতী-তীরে নৈমিষ-কাননে ।
 গৌরভাগবত-কথা শুনে ঋষিগণে ॥
 শুনিতে সে গৌরকথা দেব-পঞ্চানন ।
 সহসা আইলা হয়ে শ্রীহংস-বাহন ॥৫২
 কবে আমি ভ্রমিতে ভ্রমিতে সেই বন ।
 হেরিব পুরাণ-সভা অপূর্ব-দর্শন ॥
 শুনিব চৈতন্য-কথা শ্রীহরিবাসরে ।
 সুপুণ্য কার্ত্তিকমাসে গোমতীর ধারে ॥৫৩
 শৌনকাদি শ্রোতা ঋষিগণ কৃপা করি ।
 পদধূলি দিয়া মাথে হস্তদ্বয় ধরি ॥
 বলিবে হে নবদ্বীপবাসি! একমনে ।
 শ্রীগৌরান্ধ কথামৃত পিয় এই বনে ॥৫৪

তাহার দক্ষিণে শোভে ব্রাহ্মণ-পুষ্কর ।
 শ্রীপুষ্করতীর্থে যথা দেখে দ্বিজবর ॥
 ভজিয়ে গৌরাঙ্গপদ বিপ্র দিবদাস ।
 শ্রীগৌরাঙ্গরূপ হেরি পাইল আশ্বাস ॥৫৫
 তাহার দক্ষিণে ক্ষেত্র উচ্চহট্ট নাম ।
 ব্রহ্মাবর্ত কুরুক্ষেত্র ত্রিপিষ্টপ-ধাম ॥
 যথা দেবগণ করে গৌর-সঙ্কীৰ্ত্তন ।
 কভু ধামবাসী তাহা করেন শ্রবণ ॥৫৬
 শ্রীগৌরাঙ্গ গণ-সহ মধ্যাহ্ন সময়ে ।
 ভ্রমেণ এসব বনে প্রেমমত্ত হয়ে ॥
 ভক্তগণে কৃষ্ণলীলা সঙ্কেত বলিয়া ।
 নাচেন কীৰ্ত্তনে রাধা-ভাব আশ্বাদিয়া ॥৫৭
 আমি কবে একাকী বা ভক্তজন-সঙ্গে ।
 ভাসিব চৈতন্য-প্রেম-সমুদ্র-তরঙ্গে ॥
 মধ্যাহ্নে ভ্রমিব মধ্যদ্বীপ বনচয়ে ।
 প্রভুভাব-বিভাবিয়া অকিঞ্চন হ'য়ে ॥৫৮
 মধ্যদ্বীপবাসি ভক্তগণ কৃপা করি ।
 দেখাইবে ঐ দেখ গৌরাঙ্গ-শ্রীহরি ॥
 ব্রহ্মকুণ্ড তীরে ব্রহ্মানগর-ভিতরে ।
 কীৰ্ত্তন ঘটায় নাচে লয়ে পরিকরে ॥৫৯
 কবে বা দেখিব সেই পুরটসুন্দর ।
 অপূৰ্ব-মূরতি গোরা বনমালাধর ॥
 দীর্ঘবাহু হ'য়ে উচ্চৈঃস্বরে ডাকি' বলে ।
 হরিনাম বল ভাই একত্রে সকলে ॥৬০
 অমনি শ্রীবাস আদি যত ভক্তজন ।
 হরি হরি বলিয়া করিবে সংকীৰ্ত্তন ॥
 কেহ বা বলিবে গৌরহরি বল ভাই ।
 গৌর-বিনা রাধাকৃষ্ণ-সেবা নাহি পাই ॥৬১

উচ্চহট্ট সন্নিকটে পঞ্চবেণী নাম ।
 দেবতীর্থ যথা দেবগণের বিশ্রাম ॥
 জাহ্নবী ত্রিধারা সরস্বতী শ্রীযমুনা ।
 মিলিয়াছে গৌরসেবা করিয়া কামনা ॥৬২
 গণ-সহ গৌরহরি যথা করি' স্নান ।
 কলিপাপ হইতে তীর্থে কৈল পরিত্রাণ ॥
 পঞ্চবেণী হেন তীর্থ এ চৌদ ভুবনে ।
 নাহি দেখে বেদব্যাস আর ঋষিগণে ॥৬৩
 কবে পঞ্চবেণী-জলে করিয়া স্নপন ।
 শ্রীগৌরাঙ্গ-পাদপদ্ম করিব স্মরণ ॥
 গৌরপদপূত বারি অঞ্জলি ভরিয়া ।
 পিয়া ধন্য হব গৌর-প্রসঙ্গে মাতিয়া ॥৬৪
 পঞ্চবেণী-পারে কোলদ্বীপ মনোহর ।
 কোলরূপে প্রভু যথা ভক্তের গোচর ॥
 শ্রীবরাহক্ষেত্র বলি' সর্বশাস্ত্রে কয় ।
 দেবের দুর্লভ স্থান চিদানন্দময় ॥৬৫
 কুলিয়াপাহাড়-নামে প্রসিদ্ধ জগতে ।
 শ্রীগৌরাঙ্গলীলাস্থান শ্রেষ্ঠ সর্বমতে ॥
 শ্রীকৃষ্ণচৈতন্য যথা সন্ন্যাসের পর ।
 ব্রজযাত্রা-হলে দেখে নদীয়া নগর ॥৬৬
 বিদ্যাবাচস্পতি-বিদ্যালয় যেই স্থানে ।
 বিশারদপুত্র তেঁহ কেবা নাহি জানে ॥
 প্রভুর একান্ত ভৃত্য শুদ্ধভক্তিবলে ।
 আকর্ষিল নিজপ্রভু গঙ্গাস্নান ছলে ॥৬৭
 কবে আমি গঙ্গাতীরে দাঁড়াইয়া রব ।
 বিদ্যাবাচস্পতি-দ্বারে দেখিয়া বৈভব ॥
 কতক্ষণে কৃপা করি প্রভু যতীশ্বর ।
 হইবে প্রাসাদোপরি নয়নগোচর ॥৬৮

দেখিয়া কনককান্তি সন্ধ্যাস-মূরতি ।
 ভূমে পড়ি' বিলোকিব করিয়া আকুতি ॥
 দ্বারকায় রাজবেশে শ্রীকৃষ্ণে দেখিয়া ।
 কাঁদিল যেমন গোপী যমুনা স্মরিয়া ॥৬৯
 আমি চাই গৌরচন্দ্রে লইতে মায়াপুরে ।
 যথায় কৈশোর বেশ শ্রীঅঙ্গেতে স্ফুরে ॥
 যথায় চাঁচর কেশ ত্রিকচ্ছ-বসনে ।
 ঈশোদ্যানে লীলা করে ভক্তজন সনে ॥৭০
 সেই বটে এই যতি আমি সেই দাস ।
 প্রভুর দর্শন সেই অনন্ত বিলাস ॥
 তথাপি আমার চিত্ত পৃথুকুণ্ড তীরে ।
 প্রভুরে লইতে চায় শ্রীবাস-মন্দিরে ॥৭১
 তথা হৈতে কিছু আগে করি দরশন ।
 শ্রীসমুদ্রগড়তীর্থ জগতপাবন ॥
 যথা পূর্বে ভীম যুদ্ধে শ্রীসমুদ্রসেনে ।
 দেখা দিল দীনবন্ধু শুদ্ধভক্ত জে'নে ॥৭২
 যথায় সাগর আসি গঙ্গার আশ্রয়ে ।
 নবদ্বীপ-লীলা দেখে প্রেমে মুগ্ধ হয়ে ॥
 শ্রীগঙ্গাসাগর-তীর্থ নবদ্বীপপুরে ।
 নিত্য শোভা পায় যথা দেখে সুরাসুরে ॥৭৩
 ধন্য জীব কোলদ্বীপ করে দরশন ।
 পরম-আনন্দধাম শ্রীবহুলাবন ॥
 কীর্তন-আবেশে যথা শ্রীশচীকুমার ।
 ভক্তগণ সঙ্গে লয়ে নাচে কতবার ॥৭৪
 কোলদ্বীপ কৃপা করি এই অকিঞ্চনে ।
 দেহ নবদ্বীপবাস ভক্তজন সনে ।
 শ্রীগৌরঙ্গ-লীলাধনে দেহ অধিকার ।
 জীবনে-মরণে প্রভু গৌরঙ্গ আমার ॥৭৫

কোলদ্বীপ-উত্তরাংশে চম্পাহট্ট গ্রাম ।
 সদা শোভা করে যাঁহা নবদ্বীপ ধাম ॥
 মহাতীর্থ চম্পাহট্ট গ্রাম মনোহর ।
 জয়দেব যথা ভজে গৌরশশধর ॥৭৬
 যথা বাণীনাথ-গৃহে শচীর নন্দন ।
 সপার্ষদে করিলেন নামসঙ্কীৰ্ত্তন ॥
 বাণীনাথ-গৃহে হৈল মহামহোৎসব ।
 গৌরঙ্গ দেখায় নিজ প্রেমের বৈভব ॥৭৭
 চম্পাহট্ট গ্রামে আছে চম্পকের বন ।
 চম্পলতা করে যথা কুসুম চয়ন ॥
 নবদ্বীপে শ্রীখদিরবন সেই গ্রাম ।
 ব্রজে যথা রামকৃষ্ণ করেন বিশ্রাম ॥৭৮
 ঋতুদ্বীপ বনময় অতি মনোহর ।
 বসন্তাদি ঋতু যথা গৌরসেবাপর ॥
 সর্বত্র সেবিত ভূমি আনন্দ-নিলয় ।
 রাধাকুণ্ড-প্রদেশের একদেশ হয় ॥৭৯
 কভু কভু সংকীৰ্ত্তন-রঙ্গে এই স্থানে ।
 স্মরি গোচারণ-লীলা কৃষ্ণগুণগানে ॥
 শ্যামলী, ধবলি বলি ডাকে ঘন ঘন ।
 শ্রীদাম, সুবল বলি করেন ক্রন্দন ॥৮০
 আমি কবে ঋতুদ্বীপে করিয়া ভ্রমণ ।
 বন-শোভা হেরি লীলা করিব স্মরণ ॥
 রাধাকুণ্ডলীলাস্মৃতি হইবে তখন ।
 স্তুতি হইয়া তাহা করিব দর্শন ॥৮১
 মানসগঙ্গার তীরে গোচারণ-স্থল ।
 রামকৃষ্ণ-সহ দাম-বল-মহাবল ॥
 অসংখ্য গোবৎস ল'য়ে নিভূতে চরায় ।
 নানা লীলাচ্ছলে সবে কৃষ্ণগুণ গায় ॥৮২

গোপশিশুগণ রহে নানা আলাপনে ।
 চরিতে চরিতে সবে যায় দূর বনে ॥
 না দেখিয়া বৎসগণে চিন্তে সর্বজন ।
 কৃষ্ণবংশীরবে বৎস আইসে ততক্ষণ ॥৮৩
 দেখিতে দেখিতে লীলা হৈল অদর্শন ।
 ভূমিতে পড়িব আমি হ'য়ে অচেতন ॥
 কতক্ষণে সংজ্ঞা লভি' আপনি উঠিব ।
 ধীরে ধীরে বনমাঝে ভ্রমণ করিব ॥৮৪
 হা গৌরাঙ্গ! কৃষ্ণচন্দ্র! দয়ার সাগর ।
 কাঙ্গলের ধন তুমি আমি ত' পামর ॥
 এই বলি কাঁদি' কাঁদি হ'য়ে অগ্রসর ।
 দেখিব সহসা আমি শ্রী বিদ্যানগর ॥৮৫
 চারিবেদ চতুষষ্টি বিদ্যার আলায় ।
 সরস্বতী-পীঠ বিদ্যানগর নিশ্চয় ॥
 ব্রহ্মা-শিব-ঋষিগণ এ পীঠ-আশ্রয়ে ।
 সর্ববিদ্যা প্রকাশিল প্রপঞ্চ নিলয়ে ॥৮৬
 প্রভু মোর করিবেন বিদ্যার বিলাস ।
 ইহা জানি' বৃহস্পতি ছাড়ি' নিজবাস ॥
 বাসুদেব-সার্বভৌমরূপে এই স্থানে ।
 প্রচারিল সর্ববিদ্যা বিবিধ বিধানে ॥৮৭
 যে বিদ্যানগরে বসি' গৌরগুণ গায় ।
 সেই অধ্যাপক ধন্য শোক নাহি পায় ॥
 অবিদ্যা ছাড়য়ে তারে যে বিদ্যানগরে ।
 দর্শন করিয়া ভজে গৌরসুধাকরে ॥৮৮
 আমি কি দেখিব কভু শ্রীগৌরসুন্দরে ।
 বিদ্যা অনুরাগে গিয়া শ্রীবিদ্যানগরে ॥
 শ্রীবাসাপরাধে দেবানন্দ-মহাশয়ে ।
 দণ্ডিবেন বাক্য-দণ্ডে ভক্তপক্ষ হ'য়ে ॥৮৯

আমার প্রভুর লীলা অনন্ত না জানে ।
 কখন কি কার্য্যে মাতে থাকে কিবা ধ্যানে ॥
 কেন যে কীর্ত্তন ছাড়ি' পড়িয়া তাড়ায় ।
 পরাজিয়া অধ্যাপকে কিবা সুখ পায় ॥৯০
 যাই করে প্রভু তাই আনন্দজনক ।
 স্বেচ্ছাময় প্রভু তেঁহ আমি ত' সেবক ॥
 ক্ষুদ্র পরিমিত বুদ্ধি সহজে আমার ।
 বিচারিতে শক্তি নাই বিধান তাঁহার ॥৯১
 নবদ্বীপবাসী অধ্যাপকগণ তাঁর ।
 নিত্যলীলা পুষ্টিকারী প্রণম্য আমার ॥
 সকলে করুণা কর দীন অকিঞ্চনে ।
 মোরে অধিকার দেহ নাম-সংকীর্ত্তনে ॥৯২
 শ্রীবিদ্যানগর-প্রতি এই নিবেদন ।
 যে অবিদ্যা গৌরতত্ত্ব করে আবরণ ॥
 সে অবিদ্যা-জালে যেন মানস আমার ।
 আবৃত না হয় কভু থাকে মায়াপার ॥৯৩
 শোভে জহ্নুদ্বীপ বিদ্যানগর-উত্তরে ।
 যথা জহ্নু-তপবন ব্যক্ত চরাচরে ॥
 গঙ্গারে করিল পান যথা মুনিবর ।
 জাহ্নবী-স্বরূপে গঙ্গা হইল গোচর ॥৯৪
 যথা কৃষ্ণভক্ত ভীষ্ম মুনির আশ্রমে ।
 ভাগবত-ধর্ম্ম শিক্ষা কৈল বিধিক্রমে ॥
 যথা জহ্নু নিষ্কপটে করিয়া ভজন ।
 অনায়াসে পায় কৃষ্ণচৈতন্য চরণ ॥৯৫
 জহ্নু দ্বীপ ভদ্রবন কৃষ্ণলীলা স্থল ।
 নয়নগোচর কবে হবে নিরমল ॥
 সেই বনে ভীষ্মটীলা পরমপাবন ।
 তদুপরি রহি' আমি করিব ভজন ॥৯৬

রাত্র্যাগমে ভীষ্মদেব প্রশান্ত অন্তরে ।
 দরশন দিবে মোরে শুদ্ধ কলেবরে ॥
 কৃষ্ণবর্ণ বৃক্ষ তুলসীর মালা করে ।
 দ্বাদশ তিলকাস্থিত নামানন্দভরে ॥ ১৭
 বলিবে নবীন নবদ্বীপবাসী শুন ।
 আমার মুখেতে আজ গৌরান্দের গুণ ॥
 কুরুক্ষেত্র-রণে পড়ি' মরণ-সময়ে ।
 দেখিলাম কৃষ্ণচন্দ্র একচিত্ত হ'য়ে ॥ ১৮
 নির্য্যাণ-সময়ে প্রভু বলিল বচন ।
 নবদ্বীপ তুমি পূর্বে করিলা দর্শন ॥
 সেই পুণ্যে গৌর-কৃপা তোমার ঘটিল ।
 নবদ্বীপে নিত্যবাস এখন হইল ॥ ১৯
 অতএব সর্ব্ব আশা পরিত্যাগ করি' ।
 নবদ্বীপে বসি' তুমি ভজ গৌরহরি ॥
 আর না করহ ভয় বিষয়-বন্ধনে ।
 অবশ্য লভিবে সেবা গৌরান্দ-চরণে ॥ ১০০
 প্রভুর ইচ্ছায় এই ধামে সর্ব্বক্ষণ ।
 কৃষ্ণলীলা গৌরলীলা দেখে মুক্তজন ॥
 শোক, ভয়, মৃত্যু আর উদ্বেগ-কারণ ।
 বহির্মুখ ইচ্ছা নাহি জীবের পীড়ন ॥ ১০১
 শুদ্ধভক্তজন কৃষ্ণকৈঙ্কর্য্য আসবে ।
 নিজ নিজ ভজনেতে মগ্ন সুখার্ণবে ॥
 না জানে অভাব-পীড়া সংসার-যাতনা ।
 সিদ্ধকাম শুদ্ধদেহ বৈসে সর্ব্বজনা ॥ ১০২
 নিত্যমুক্ত, বদ্ধমুক্ত, ভক্তি পরিকর ।
 অনন্ত সংখ্যক দাসগণের ঈশ্বর ॥
 যার যেই ভাব, সেই ভাবে তার সনে ।
 নিত্যলীলা করে প্রভু এই সব বনে ॥ ১০৩

এ ধাম অনন্ত, জড়া মায়া হেথা নাই ।
 চিচ্ছক্তি হেথায় অধিষ্ঠাত্রী শুন ভাই ॥
 তদনুগ দেশ-কাল-করণ-শরীর ।
 সব নিৰ্ম্মায়িক সত্ত্ব এই তত্ত্ব স্থির ॥ ১০৪
 যতদিন না ছাড়িবে প্রভুর ইচ্ছায় ।
 মায়িক শরীর ততদিন তো তোমায় ॥
 না স্ফুরিবে পূর্ণরূপে এ ধামের ভাব ।
 তব বুদ্ধি না ছাড়িবে জাতীর স্বভাব ॥ ১০৫
 ভাগবতী তনু পাবে প্রভুর ইচ্ছায় ।
 অব্যাহত-গতি তব হইবে হেথায় ॥
 জড়মায়াজালের আবরণ যাবে দূরে ।
 অসীম আনন্দ পাবে এই নিত্যপুরে ॥ ১০৬
 যে-পর্য্যন্ত আছে ভাই মায়িক শরীর ।
 সাবধানে ভক্তিতত্ত্বে থাক সদা স্থির ॥
 ভক্তসেবা, কৃষ্ণনাম, যুগলভজন ।
 বিষয়ে শৈথিল্য-ভাব কর সর্ব্বক্ষণ ॥ ১০৭
 ধামকৃপা, নামকৃপা, ভক্তকৃপাবলে ।
 অসাধু-সম্বন্ধ দূরে রাখহ কৌশলে ॥
 অচিরে পাইবে তুমি নিত্যধামে বাস ।
 শুদ্ধ শ্রীযুগলসেবা হইবে প্রকাশ ॥ ১০৮
 ভীষ্মদেব-উপদেশ ধরিয়া শ্রবণে ।
 সাষ্টাঙ্গে পড়িব আমি তাঁহার চরণে ॥
 আশীর্ব্বাদ করি' তেঁহ হ'বে অদর্শন ।
 কাঁদিতে কাঁদিতে যাব মোদদ্রুম বন ॥ ১০৯
 মোদদ্রুম শ্রীভাগীর হয় এক তত্ত্ব ।
 যথা পশুপক্ষীগণে সব শুদ্ধ সত্ত্ব ॥
 মনোহর বৃক্ষডালে বসি' পিকগণ ।
 গৌরহরি সীতারাম গায় অনুক্ষণ ॥ ১১০

কত কত বটবৃক্ষ ছায়া বিস্তারিয়া ।
 শোভিছে ভাগীরবন সূর্য আচ্ছাদিয়া ॥
 রামকৃষ্ণ-লীলাস্থান প্রত্যক্ষ ভুবনে ।
 কবে বা স্মুরিবে মোর এ দুই নয়নে ॥১১১
 দেখিয়া বনের শোভা ভ্রমিতে ভ্রমিতে ।
 শ্রীরামকুটীর চক্ষে পড়ে আচম্বিতে ॥
 দুর্বাদলবর্ণ রাম ব্রহ্মচারী বেশে ।
 লক্ষ্মণ-জানকীসহ তার এক দেশে ॥১১২
 দেখিয়া শ্রীরামচন্দ্র-রূপ মনোহর ।
 অচেতন পড়িব সে কানন ভিতর ॥
 প্রেমে গর গর দেহ না স্মুরিবে বাণী ।
 দুই আঁখি ভরি পিব সেই রূপখানি ॥১১৩
 কৃপা করি' রামানুজ আসি' ধীরে ধীরে ।
 বন-ফল রাখি' পদ দিবে মম শিরে ॥
 বলিবেন, বৎস, তুমি খাও এই ফল ।
 বনবাসে ফলফুলে আতিথ্য কেবল ॥১১৪
 বলিতে বলিতে লীলা হ'বে অদর্শন ।
 কাঁদিতে কাঁদিতে ফল করিব ভক্ষণ ॥
 আর কি দেখিব আমি দুর্বাদলরূপ ।
 হৃদয়ে ভাবিব সেই অচিন্ত্য-স্বরূপ ॥১১৫
 আহা! সে ভাগীরবন চিন্তামণিধাম ।
 ছাড়িতে হৃদয় কাঁদে না হয় বিরাম ॥
 রামকৃষ্ণ করে লীলা গোচারণ-ছলে ।
 যথায় কীর্তনে মাতে গোরা নিজ দলে ॥১১৬
 ধীরে ধীরে যাব যথা শ্রীবৈকুণ্ঠপুর ।
 নিঃশ্রেয়স বন যথা ঐশ্বর্য্য প্রচুর ॥
 সর্বদেব-প্রপূজিত পরব্যোমনাথ ।
 নিত্য বিরাজেন যথা শক্তিত্রয়-সাথ ॥১১৭

যদিও মাধুর্য্যময় শ্রীকৃষ্ণ আমার ।
 তবুও ঈশ্বর তেঁহ সর্বৈশ্বর্য্যধর ॥
 ঐশ্বর্য্য না ছাড়ে কৃষ্ণ ব্রজেন্দ্রনন্দন ।
 ঐশ্বর্য্য না দেখে তবু কৃষ্ণভক্তজন ॥১১৮
 কৃপা করি' সর্বৈশ্বর ঐশ্য লুকাইয়া ।
 তুষিতে নারদচিত্ত গৌরাঙ্গ হইয়া ॥
 দেখিয়া সে রূপ আমি আনন্দসাগরে ।
 ডুবু ডুবু নাচিব কাঁদিব উচ্চৈঃস্বরে ॥১১৯
 হইয়া বিরজা পার ব্রহ্মাণীনগর ।
 ছাড়িয়া উঠিব অর্কটীলার উপর ॥
 তথা বসি' একান্তে ভজিব গৌরহরি ।
 নামসুধারসে মাতি নাম-গান করি ॥১২০
 অর্কদেব কৃপা করি দিবে দরশন ।
 রক্তবর্ণ দীর্ঘবাহু অরুণ বসন ॥
 সর্বদা তুলসীমালা চর্চিত চন্দনে ।
 মুখে সদা গৌরহরি অশ্রু দু'নয়নে ॥১২১
 বলিবেন, বৎস, তুমি গৌরভক্তদাস ।
 তোমার নিকট আমি হইনু প্রকাশ ॥
 অধিকৃতদাস মোরা গৌরাঙ্গচরণে ।
 গৌরদাস-অনুদাসে ভালবাসি মনে ॥১২২
 মম আশীর্ব্বাদে তব হবে কৃষ্ণভক্তি ।
 ধামবাসে নামগানে হবে তব শক্তি ॥
 সুধামাখা কৃষ্ণনাম গাইতে গাইতে ।
 সর্বদা আসিও হেথা আমারে তুষিতে ॥১২৩
 সূর্য্যদেবপদে করি দণ্ডপরণাম ।
 অগ্রসর হ'য়ে পাব মহৎপুর ধাম ॥
 মহৎপুর কাম্যবন কৃষ্ণলীলা স্থল ।
 যথা গৌরগণ করে কৃষ্ণকোলাহল ॥১২৪

যুধিষ্ঠির আদি পঞ্চ ভাই যেই বনে ।
 কত দিন বাস কৈল দ্রৌপদীর সনে ॥
 ব্যাসদেবে আনি গৌরপুরাণ শুনিল ।
 একান্তে শ্রীগৌরহরি ভজন করিল ॥১২৫
 অদ্যাপিও কাম্যবনে দেখে ভক্তজন ।
 যুধিষ্ঠির-সভা যথা বৈসে ঋষিগণ ॥
 ভৌম শুক, দেবল, চ্যবন, গর্গমুনি ।
 বৃক্ষতলে বসি' কান্দে গৌরগাথা শুনি' ॥১২৬
 আমি কবে সে সভায় করিব গমন ।
 দূরে দণ্ডবৎ করি' আসিব তখন ॥
 পাষণ্ড-উদ্ধার-লীলা গৌর-ইতিহাস ।
 ব্যাসমুখে শুনি প্রেমে ছাড়িব নিঃশ্বাস ॥১২৭
 কতক্ষণ পরে পুনঃসভা না দেখিয়া ।
 কাঁদিব গৌরাঙ্গ বলি' ভূমে লুটাইয়া ॥
 দ্বিপ্রহর দিনে ক্ষুধা হইলে উদয় ।
 ভোজনার্থে বনফল করিব সঞ্চয় ॥১২৮
 এমত সময়ে কৃষ্ণ পাণ্ডব-গৃহিণী ।
 শাক-অন্ন ল'য়ে কবে আসিবে অমনি ॥
 বলিলেন, বৎস, লহ আতিথ্য আমার ।
 গৌরাঙ্গ-প্রসাদ অন্নমুষ্টি দুই চার ॥১২৯
 সাষ্টাঙ্গে প্রণামি তাঁরে আমি অকিঞ্চন ।
 কর পাতি' শাক অন্ন করিব গ্রহণ ॥
 গৌরাঙ্গ-প্রসাদ-অন্ন-শাক চমৎকার ।
 সেবা করি' ধন্য হবে রসনা আমার ॥১৩০
 মহাপ্রসাদের কৃপা যেই জীবে হয় ।
 শুদ্ধকৃষ্ণভক্তি তার মিলিবে নিশ্চয় ॥
 সেই কৃপা নিত্য যেন হয় ত' আমার ।
 অনায়াসে ছাড়ি' যাব অনন্ত মায়ার ॥১৩১

দ্রৌপদী-প্রদত্ত মহাপ্রসাদ পাইয়া ।
 উপনীতহব কবে রুদ্রদ্বীপে গিয়া ॥
 কৈলাস যাঁহার প্রভা-মাত্র ত্রিভুবনে ।
 সেই রুদ্রদ্বীপ শোভে নবদ্বীপ বনে ॥১৩২
 যথা নীল লোহিতাদি রুদ্র একাদশ ।
 নৃত্য করে গৌরপ্রেমে হইয়া বিবশ ॥
 যথায় দুর্কাসামুনি করিয়া আশ্রম ।
 গৌরাঙ্গচরণ ভজে ছাড়ি' যোগভ্রম ॥১৩৩
 অষ্টাবক্র-দত্তাশ্রয়-আদি যোগিগণ ।
 ছাড়িয়া অদ্বৈত-বুদ্ধি সহ পঞ্চগনন ॥
 শ্রীকৃষ্ণচৈতন্যপদধ্যানে হয় রত ।
 সাযুজ্য মুক্তিকে ছাড়ে হইয়া বিরত ॥১৩৪
 কভু আমি ভ্রমিতে ভ্রমিতে রুদ্রবন ।
 মেচ্ছল-সন্নিকটে করিব গমন ॥
 বসিব তথায় গৌরপদ ধ্যান করি ।
 অদূরে দেখিব দেবী পরমা সুন্দরী ॥১৩৫
 বনদেবী মনে করি, করিব প্রণাম ।
 জিজ্ঞাসিব, বল মাতা কিবা তব নাম ॥
 অশ্রুমুখী দেবী তবে বলিবে বচন ।
 শুন বাছা, মোর দুঃখ অকথ্য-কখন ॥১৩৬
 পঞ্চবিধ জ্ঞান কন্যা মোরা পঞ্চজন ।
 পঞ্চবিধ মুক্তি নাম করেছে শ্রবণ ॥
 সালোক্য, সামীপ্য, সার্ঘ্য, সাযুজ্য নির্বাণ ।
 নির্বাণ সাযুজ্য মোরে নাম কৈল দান ॥১৩৭
 চারি ভগ্নি গেলা চলি বৈকুণ্ঠনগর ।
 আমি ত' রহিনু একা হইয়া ফাঁপর ॥
 শিবের কৃপায় দত্তাশ্রয় আদিজন ।
 কিছুদিন আমা-প্রতি করিল যতন ॥১৩৮

এবে সেই ঋষিগণ ছাড়িয়া আমায় ।
 রুদ্রদ্বীপে বৈসে এই সর্বলোকে গায় ॥
 বৃথা আমি অন্বেষণ করি সেই সবে ।
 দেখা নাহি পাই আর পাব কোথা কবে ॥১৩৯
 শ্রীগৌরঙ্গপ্রভু সর্বজনে নিস্তারিল ।
 কেবল আমার প্রতি নির্দয় হইল ॥
 আমি যেই স্থানে এবে ছাড়িব জীবন ।
 নিদয়া বলিয়া স্থান জানু সর্বজন ॥১৪০
 সাযুজ্যের নাম শুনি' কাঁপিবে হৃদয় ।
 পূতনা রাক্ষসী বলি হবে বড় ভয় ॥
 আঁখি মুদি' সেই স্থানে পড়িয়া রহিব ।
 কোন মহাজনস্পর্শে তখন উঠিব ॥১৪১
 উঠিয়া দেখিব আমি দেব পঞ্চানন ।
 ববম্ ববম্ বলি' করিয়া নর্ত্তন ॥
 গাইবেন শ্রীশচীনন্দন দয়াময় ।
 দয়া কর সর্বজীবে দূর কর ভয় ॥১৪২
 দেবদেব মহাদেব-চরণে পড়িব ।
 স্বভাব-শোধন লাগি' পদে নিবেদিব ॥
 দয়া করি বিশ্বেশ্বর মস্তক আমার ।
 ধরিয়া চরণ দিবে উপদেশ-সার ॥১৪৩
 বলিবেন, ওহে শুন, কৃষ্ণভক্তি সার ।
 জ্ঞান কৰ্ম্ম মুক্তিচেষ্টা যোগ আদি ছার ॥
 আমার কৃপায় তুমি পরাজিয়া মায়া ।
 অতি শীঘ্র প্রাপ্ত হবে গৌরপদছায়া ॥১৪৪
 দক্ষিণে পুলিন দেখ অতি মনোহর ।
 বৃন্দাবনধাম নবদ্বীপের ভিতর ॥
 তথা গিয়া কৃষ্ণলীলা কর দরশন ।
 অচিরে পাইবে রাধিকার শ্রীচরণ ॥১৪৫
 শব্দ অদর্শন হবে উপদেশ দিয়া ।
 প্রণমি' চলিব আমি কাঁদিয়া কাঁদিয়া ॥

কতক্ষণে শ্রীপুলিন করিব দর্শন ।
 ভূমে গড়াগড়ি দিয়া হব অচেতন ॥১৪৬
 অচেতনকালে স্বপ্ন-স্বরূপ সমাধি ।
 উদিবে অপূর্ব মূর্ত্তি নিজকার্য সাধি' ॥
 তখন জানিব আমি কমলমঞ্জরী ।
 শ্রীঅনঙ্গমঞ্জরীর নিত্য বিধিকারী ॥১৪৭
 অনঙ্গমঞ্জরী মোর হৃদয়-ঈশ্বরী ।
 দেখাইবে কৃপা করি' নিজ যুথেশ্বরী ॥
 শ্রীকপূর সেবা মোরে করিবে অর্পণ ।
 যুগলবিলাস করাইবে প্রদর্শন ॥১৪৮
 পুলিন নিকটে স্থান শ্রীরাসমণ্ডল ।
 গোপেন্দ্রনন্দন-লীলা তথা নিরমল ॥
 শতকোটি-গোপী মাঝে মহারাসেশ্বরী ।
 সহ নৃত্য করে কৃষ্ণসর্বচিত্ত হরি' ॥১৪৯
 সে রাসলাস্যের শোভা নাহি ত্রিভুবনে ।
 বহু ভাগ্যে যেবা দেখে মজে সেই ক্ষণে ॥
 স্ব-সমাধি ভাগ্যবলে কেহ কভু পায় ।
 সে শোভাদর্শনসুখ ছাড়িতে না চায় ॥১৫০
 দেখিব যে শোভা তাহা বর্ণিতে নারিব ।
 হৃদয়ে রাখিয়া সদা দর্শন করিব ॥
 নিজ কুঞ্জে বসি' হৃদি মাঝে আলোচিব ।
 সখীর নির্দেশ মতে সতত সেবিব ॥১৫১
 অনঙ্গমঞ্জরীর সখী রাধিকা-ভগিনী ।
 মোরে কৃপা করি' ধাম দেখাবে আপনি ॥
 রাসস্থলী-পশ্চিমেতে শ্রীধীর সমীর ।
 কিছু দূরে বংশীবট শ্রীযমুনা তীর ॥১৫২
 শ্রীরূপমঞ্জরী-প্রস্নে ঈশ্বরী আমার ।
 বলিবে এ নবদাসী সখী ললিতার ।
 কমলমঞ্জরী নাম গৌরান্ধকগতি ।
 কৃপা করি' দেহ এরে রামমার্গ গতি ॥১৫৩

ঈশ্বরীর কথা শুনি শ্রীরূপ-মঞ্জরী ।
 বুলাইবে কৃপা-হস্ত মম দেহোপরি ॥
 সহসা হইবে মোর রাগের উদয় ।
 রূপানুগ ভজনেতে স্পৃহা অতিশয় ॥১৫৪
 তড়িৎঘর্ষণে তারাবলি বসন ভূষণে ।
 শ্রীকৃপার পাত্র করে সখীর চরণে ॥
 দণ্ডবৎ হইয়া আমি পড়িব তখন ।
 মাগিব অনন্যভাবে রাধার চরণ ॥১৫৫
 শ্রীরূপমঞ্জরী ও শ্রীঅনঙ্গমঞ্জরী ।
 লবে যথা স্বানন্দসুখদকুঞ্জেশ্বরী ॥
 রাধা-শ্রীচরণ-সেবা সদা চিন্তা করে ।
 শ্রীললিতা সুললিতা-স্বকুঞ্জ ভিতরে ॥১৫৬
 সাষ্টাঙ্গে বন্দিব আমি তাঁহার চরণ ।
 সখী করিবেন মম কথা বিজ্ঞাপন ॥
 বলিবেন, নবদ্বীপবাসী এই জন ।
 তব দাসী হ'য়ে মাগে যুগলসেবন ॥১৫৭
 প্রসন্ন হইয়া তবে ললিতা সুন্দরী ।
 শৈষী-শক্তি-প্রতি কবে, শুন প্রিয়ঙ্করি ॥
 তোমার কুঞ্জের পার্শ্বে করি' স্থান দান ।
 রাখিয়া যতন করে ঈষ্পিত বিধান ॥১৫৮
 তোমার সেবার কালে সঙ্গে ল'য়ে যাবে ।
 ক্রমে তব দাসী রাধাপ্রসাদ পাইবে ॥
 শ্রীরাধাপ্রসাদ বিনা শ্রীযুগলসেবা ।
 বল দেখি কোনকালে পাইয়াছে কেবা ॥১৫৯
 ললিতার বাক্য শুনি' অনঙ্গমঞ্জরী ।
 রাখিবেন নিজকুঞ্জে নিজদাসী করি' ॥
 যুগল-সেবার কালে সঙ্গিনী করিয়া ।
 লইবে আমারে তেঁহ স্নেহ প্রকাশিয়া ॥১৬০
 দূরে হৈতে নিজ কার্য্য করি সম্পাদন ।
 হেরিব যুগল রূপ প্রিয়-দরশন ॥

কভু বা শ্রীমতী মোরে আঞ্জা প্রকাশিয়া ।
 দেখাইবে নিজ কৃপা পদছায়া দিয়া ॥১৬১
 সেই ত' সেবায় আমি রব চিরদিন ।
 ক্রমে সেবা-কার্য্যে আমি হইব প্রবীণ ॥
 সেবার কৌশলে রাধাগোবিন্দ তুষিব ।
 কভু কভু অলঙ্কার প্রসাদ লভিব ॥১৬২
 স্বপ্ন-ভঙ্গে ধীরে ধীরে কাঁদিয়া কাঁদিয়া ।
 ভাগীরথী পার হব পুলিন দেখিয়া ॥
 ঈশোদ্যান-সন্নিকটে নিজ কুঞ্জে বসি' ।
 ভজিব যুগল ধন শ্রীগৌরাঙ্গ-শশী ॥১৬৩
 স্বনিয়মে থাকি' রাধাগোবিন্দ ভজিব ।
 রাধাকুণ্ড বৃন্দাবন সতত হেরিব ॥
 অনঙ্গমঞ্জরী সখী-চরণ স্মরিয়া ।
 নিজ সেবানন্দে র'ব প্রেমেতে ডুবিয়া ॥১৬৪
 শ্রীকৃষ্ণ চৈতন্য প্রভুর দাস-অনুদাস ।
 এ ভক্তিবিনোদ মাগে নবদ্বীপ-বাস ॥
 রূপ-রঘুনাথ-পদে আকুতি করিয়া ।
 নিজাভীষ্ট-সিদ্ধ মাগে ব্যাকুল হইয়া ॥১৬৫
 নবদ্বীপ-বৃন্দাবন-ক্ষেত্রবাসিগণ ।
 ঈশাক্ষেত্রে কর মোরে অচিরে স্থাপন ॥
 তোমাদের ক্ষেত্র এই আমি-মাত্র দাস ।
 তোমা সবা-সেবাচ্ছলে পাই ক্ষেত্রবাস ॥১৬৬
 নবদ্বীপ কর মোরে কৃপা বিতরণ ।
 তব কৃপা বিনা ক্ষেত্র লভে কোন্ জন ॥
 আমার যোগ্যতা লয়ে না কর বিচার ।
 জাহ্নবা-নিতাই আঞ্জা করিয়াছি সার ॥১৬৭
 শ্রদ্ধায় পড়িবে যেই এ ভাব-তরঙ্গ ।
 উদিবে তাহার মনে শ্রীগৌর-রস-রঙ্গ ॥
 শ্রীস্বরূপদামোদর তারে করি দয়া ।
 লইবে নিজের গণে দিয়া পদছায়া ॥১৬৮

শ্রীশ্রীনবদ্বীপ-ভাবতরঙ্গ সমাপ্ত ।